

Date – 11/07/2026
Time - 7:30 -7:40 Hrs
AKASHVANI AIZAWL

HEADLINES (MORNING)

1. Chief Minister Pu Lalduhoma'n Fur ruahtui tam avanga harsatna hmun hrang hranga thlenna hmunah Zo nun ze mawi hmuh theiha a awm chu lawmawm atih thu a sawi.
2. Horticulture Minister Pu C. Lalsawivunga'n Horticulture Department chu kut hnathawktute nena inhne hnai ber, Mizoram din chhuahna tura pawimawh ber te zinga mi ani a ti.
3. Power & Electricity Minister Pu F. Rodinglana hova P&E Department hotute thukhawm chuan Aizawl khawpui chhung power supply tihchangtlun dan tur an ngaihtuahin Inrinni-a Shutdown lak thin chu tih tlem an rel.
4. FIFA World Cup 2026 Quarterfinal inkhelah nizan khan Spain-in 2-1 in Belgium an hneh.

<><><>

CM

Chief Minister Pu Lalduhoma'n Fur ruahtui tam avanga harsatna hmun hrang hranga thlenna hmunah Zo nun ze mawi hmuh theiha a awm chu lawmawm atih thu a sawi.

Pu Lalduhoma chuan Social media kaltlangin he thu hi a sawi a, Bualte khawtlangin an khuaa khualzin tangkhangte an tanpui dan chu Zo nun ze mawi lantirtu ani a ti a, Tlabung YMA leh khawtlang mipuiten tuilian avanga harsatna tawkte vil a chhungkaw 100 dawn hmun him lamah an suan chhuak tawh tih sawiin Tanpui ngaite tanpui tura an inpekna chu chhuanawm atih thu a sawi.

Chief Minister chuan hmun hrang hranga chhiatna thlengah a tuartute chhawmdawlin YMA leh khawtlang mipuite an tang zel a ti a, Mizo nunze mawi tak chu Mizo hnam phuarkhawmtu ni zel se a duh tih sawiin Sorkarin chhiatna tawkte chu a theih angin a tuamhlawm zel dawn a ti bawk.

Pu Lalduhoma chuan IMD thlirlawkna thar berah Mizoram hmun hrang hrangah ruah a sur chhunzawm zel dawn avangin chhiatna lian zawk a thlen loh nan mi tin fimkhur turin a chah a ni.

<><><>

MZU UNDER GRADUATE RESULT

Mizoram University in nimina Under Graduate Examination 2026 result a tihchhuah ah zirlai exam 16187 zinga 13260 an passed a, pass percentage hi 82.68% a ni.

Nimina Under Graduate result tihchhuah hi May leh June thlaa Second Semester, Fourth Semester leh Sixth Semester Exam Result a ni a, Regular-a Exam mi 13918 awmin 11844 an passed a, Repeater 2269 awmin mi 1416 in hlawhtlinna an chang a ni.

Bachelor of Arts-ah exam 13164 zinga 10781 passed in pass percentage 82.66 % a ni a, Bachelor of Science ah exam 1946 awmin 1493 an passed a, pass percentage 77.56% a ni. Bachelor of Commerce exam mi 950 ah 877 passed in pass percentage 92.80% a ni a, Bachelor of Science (Home Science) ah exam mi 70 atangin mi 60an passed a, Bachelor of Social Work ah exam 57 awmin 49 in hlawhtlinna an chang a, a pumpui pass percentage chu 82.68% a ni.

Govt Hnahthial College-a Principal Lalsiamthanga chuan kumina Under Graduate Result chhuakah Hnahthial College atanga zirlaite an passed kim vek tih sawiin Mizo Department ah 4-na hial an hauh thei tih a sawi bawk.

<><><>

HORTICULTURE MINISTER

Horticulture Minister Pu C. Lalsawivunga'n Horticulture Department chu kut hnathawktute nena inhne hnai ber, Mizoram din chhuahna tura pawimawh ber te zinga mi ani a ti.

Nimina Horticulture Department Review Meeting a hmanpui na ah he thu hi sawiin Pu C. Lalsawivunga chuan Horticulture chu kut hnathawktute nena inhne hnai ber, Mizoram din chhuahna tura pawimawh ber te zinga mi ani tiin a hmun ngeia kut hnathawktute te hnena thlai chin dan zirtir a, enpui bakah nasa lehzuala feh chhuak turin a fuih a ni.

Pu C. Lalsawivunga chuan Organic farming kalpui a tulzia sawiin Mizorama natna tam tak an neih mek, tun hmaa hriat ngai lohdamdawi leh hlo tur te ei tel tam vang anih thei a ti a, Department chuan chuktuah huana thil chin kalpui a nih theih nan chak zawka hma lak a tul thu a sawi a, kut hnathawktute pawhin heng chemical thil an hman thin te bansan a, hriselna ngai pawimawh chung a hna thawk turin a chah a. Department-in hma lak tanna atan Organic farming hmanga Sawhthing chinga Research a lo kalpui chu lawmawm a tih thu a sawi.

<><><>

WORLD INDIGENOUS DAY

ZORO General Headquarters chuan nimin khan Chief Minister Pu Lalduhoma chu a Pisa-ah hmu in World Indigenous day lo thleng tur chungchang leh pawl hmalakna hrang hrang an sawipui a ni.

World Indigenous Day (International Day of the World's Indigenous Peoples) hi kumtin August ni 9 hian khawvel pumah hman thin a ni a. Kumin World Indigenous Day hi ZORO General Headquarters chuan ropui taka hman a tum a, he ni hi hnam tlem zawk, tualto hnam-te chanvo humhalh a, an thawnthu leh nunphung vawng nung tura hriat chhuah nan leh chawimawi nan hman thin a ni.

World Indigenous Day hi Zofa Indigenous People te tan a pawimawh hle a. Khawvel hmun hrang hranga tualto hnamte dinhmun chawikan leh an dikna chanvo humhalh a, anmahni zalenna leh inrelbawlina zahsak nan te, ram leilung hausakna leh ramngaw awm zawng zawng vawng him a, khawvel tana an inpekna leh humhalh tlatna hriatreng nan hman thin a ni.

<><><>

POWER SHUTDOWN

Power & Electricity Minister Pu F. Rodingliana hova P&E Department hotute thukhawm chuan Aizawl khawpui chhung power supply tihchangtlun dan tur an ngaihtuahin Inrinni-a Shutdown lak thin chu tih tlem an rel.

P&E Minister pisa-a thutkhawmah hian Aizawl khawpui chhunga power supply tichangtlung tura hmalak dan tur te, power khaihlak awm thin chhan leh siam that dan tur sawiin chhan hrang hrang avanga Inrinni-a shutdown lak thin chu tihtawp dan tur an ngaihtuah a ni.

Thuthkawmah hian Aizawl khawpui chu 33 kV ring line hmanga veh chhuah vek a nih theih nan hmalak an remti a, Chawnpui, Durtlang North leh MINECO area-a eng kal dan fel lo awm fo thin tih reh nan Chawnpui Sub-Station thuam tha tura a tul anga bawh zui nghal a ni dawn a. Ruahsur laia isolator chhia siamthat mai theih loh avanga rei tak current awm lo thin pumpelh nan circuit breaker te siam that vek a, isolator pawh a tul anga in chhunga daha control room atanga hnathawh dawna shutdown lak pawh him taka tih theih tura ruahman a ni a. 11 kV line-in a chawm thui lutuk te tihtawi nan Aizawl hmun remchang aiah 11 kV sub-station siam belh a, 11 kV line te thentet tura ruahman a ni, heng bakah hian ABC line earthing tha lo a tam avanga line chhia awm thinte tih reh nan earthing siamthat remtih a ni bawk.

<><><>

DRUGS SEIZURE

Mizoram Police chuan kuminah Ruihhlo thanhnem tak hman tawhin thubuai 219 an ziak lut tawh a, kuminah ruihhlo cheng vbch 414 leh nuai 66 chuang hu an man tawh.

Mizoram Police chuan kumin January atanga June thla tawp thleng khan Heroin Kg. 34.923; Methamphetamine Kg. 315.903; Crystal Meth Kg. 20.628; Ganja Kg. 60.681; Opium Kg. 141.492; Morphine Kg. 22.286; Codeine Kg. 214.4 leh Alprazolam Kg. 30 an man a, heng ruihhlo an man hi a vaiin Rs. vbch. 414, nuai 66, sing 8, sang 6 leh 466 hu a ni a. Hemi kaihhnawihah hian thubuai 219 an ziak lut a, mihring 312 an man a, an mi ma zinga 255 chu India mi an ni a, mi dang 57 chu ram dang mi an ni.

Mizoram Police chuan, Mizoram leh hnam humhimna atana Sorkar, VC, YMA leh NGO hrang hrang tang hovin ruihhlo do beihpui an thlaknaah theihtawp chhuahpui a, dan lova ruihhlo tawlh hria an awm a nih chuan hriattir thin turin mipui an ngen a. Thla 6 chhung leka hetiang zat ruihhlo man a ni hian ruihhlo beihna kawnga Mizoram Police hmalakna leh thawhrimna chiang taka a tarlan rualinm nasa leh zuala ruihhlo dona kawnga hmalak a tul zia a tarlan avangin theihtawp chhuahpui zel turin mipuite an sawm a ni.

Central YMA hnuaia ruihhlo do pawl CADS pawhin July ni 4 atanga ni 10 inkarah Ruihhlo manin hemi kaihhnawihah hian mi 20 an man tel a, an mi man te hi Counselling kal tir an ni.

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

KOLASIB DAPCC

Kolasib District AIDS Prevention and Control Committee chuan HIV/AIDS chungchang inhrilhhriatna chu zirlai naupangte leh mipui zingah uar lehzuala kalpui a ngaih thu an sawi.

Nimin khan DC Conference Hall, Kolasib-ah Kolasib Bawrhsap Pu H. Dolianbuaia kaihhruaiin DAPCC thutkhawm neih a ni a, thutkhawmah hian HIV/AIDS chungchang inzirtirna chu zirlaite leh khawtlangah uar taka kalpui a ngaih thu an sawi a, sawrkar leh tlawmngai pawlte nen thawk hovin hmun hrang hrangah he inzirtirna hmalakna hi uar zawka kalpui mamawh an tih thu an sawiho a ni.

Thutkhawmah hian HIV/AIDS hriat chhuah leh ven kawngah HOME hrang hrangah te invenna leh inentirna uar zawka kalpui nise tih rel a ni bawk.

<><><>

NCC INTER-GROUP BAND COMPETITION 2026

20 Mizoram Battalion NCC (Aizawl Group) Pipe Band chu New Delhi-a Republic Day Camp lo awm turah NCC North Eastern Region Directorate aiawh tura thlan an ni.

NCC North Eastern Region (NER) Directorate hmalakna-a Group Headquarters, Aizawl hnuaia 20 Mizoram Battalion NCC, Aizawl chuan 'NER Inter-Group Band Competition 2026' chu Aizawl Lammual ah nimin khan neih a ni a, NCC North Eastern Region Additional Director General (ADG) Major General Anurag Vij chuan a hmanpui a ni.

He inelna hi New Delhi-a Republic Day lawmna huna aiawh tur thlanna niin inelnaah hian Assam, Meghalaya, Nagaland, leh Mizoram atangin band hrang hrang an tel a, heng cadet-te hian July ni 4 atang khan STC, Tanhril-ah training khauhtak an lo nei tawh a ni.

<><><>

REFUGEE AID

Serchhip Bawrhsap Pu Paul L Khuma chuan Serchhip District chhunga raltlan awm mek te hnena sem tur Buhfai KG 31789 chu Serchhip DC Office Tual atangin a vailiam.

DC in nimina a vailiam hi Branch YMA ten raltlan list-an lak khawm te hnenah mi pakhat tan kg. 35 zel hisapa semchhuah a ni dawn a, Sub-Hqrs. YMA Serchhip in a huam loh Baktawng leh Chhuanthar Tlangnuam huam chhunga raltlan te hnenah pawh buhfai hi sem tur niin July 24 thleng sem tura ruahman a ni a, Serchhip District ah hian Myanmar atanga raltlan mi 648 awmin Bangladesh atanga raltlan mi 239 leh Manipur atanga raltlan mi 21 an awm a ni.

<><><>

FIFA

FIFA World Cup 2026 quarterfinal inkhelah nizan khan Spain-in 2-1 in Belgium an hneh a.Spain hian Minute 30-naa Fabian Ruiz-a goal hmanga hma an hruai hnuah Belgium tan De Ketelaere chuan minute 41-naah an siphurh a rawn sut a.Hun tawp dawn Minute 88-ah Mikel Merino chuan Spain chakna goal a rawn thun a ni. Spain hian Semifinal ah France an tum dawn a ni. Naktuk zingah Quarterfinal hi khelchhunzawm a ni dawn a. Zing dar 2.30 ah Team ngaihven ber pawl England leh Norway an inkhel ang a. Zing dar 6.30 ah Argentina leh Switzerland an inkhel leh bawk ang.

<><><>